

四庫全書

集部

欽定四庫全書

集部

竹澗集奏議卷二

詳校官中書臣孫溶

中書臣劉源溥覆勘

總校官知縣臣楊懋珩

校對官中書臣李荃

膳錄監生臣唐燦

欽定四庫全書

竹澗集奏議卷一

明 潘希曾 撰

諫垣六首 卿寺四首

遵詔旨以正黃緣疏

題為遵詔旨以正黃緣事近該兵部依奉詔條查奏傳
乞冗員陛下酌量裁減初政維新又該節奉聖旨今後
敢有仍前黃緣傳乞的著科道并該衙門指實來說臣

惟先帝在位蓋嘗裁冗濫禁黷緣陛下篤於繼述既播
諸詔旨矣邇者兵部叅奏左監丞王潤題稱已故太監
汪直生前頗有微勞乞要查伊義男汪鈺汪璫原功量
與官職看守故塋一節查該奉有憲宗皇帝聖旨著革
職為民間住及奉有孝宗皇帝聖旨罷難又別為議擬
等因奉聖旨准他汪鈺陞錦衣衛所鎮撫帶俸汪璫與
做總旗照例食糧欽此竊惟方今錦衣衛所人員計見
任管事外不知幾人帶俸幾人食糧再授汪鈺等職役

豈非冗濫況彼冒功得官先朝累經革罷忽於今日乞
陞豈非夤緣王潤此舉其欺蔽非細故也臣聞名不正
則言不順理既屈則辭必窮彼稱汪直微勞以欺陛下
獨不思憲廟用舍與衆為公向革汪鈺等職豈無見而
負人功乎又稱孤墳可憫以欺陛下獨不思先帝賓天
言猶在耳顧忍改於其道乎陛下聖心純孝通於神明
初政嚴明堅如金石必不肯背憲廟以念汪直忘先帝
以憫孤墳輕天下大信以徇羣小之私臣獨恨王潤等

巧肆夤緣朦朧奏請致令命下衆共驚疑查得汪直先
年出師得不補失而且生受蟒衣玉帶歿蒙諭祭安葬
就使有功其報已為過分即今雖歿其墳未為失所不
知汪直果何大功可以祿及義男汪鉦等如何守墳必
須朝廷官職況世祿以及子孫鬼神不歆非類內臣本
無後而強求世祿之恩義男本異姓而欲冒他鬼之廕
物理人情甚是無謂其為此舉非姦則愚臣叨備言責
誠恐夤緣得計則事體漸乖將來弊風不可救止雖知

事干近倖不敢隱默規避以負陛下伏乞聖明加察特
勅法司將王潤等究治仍革汪鉦等職役則政體歸一
而姦回之徒不敢肆其欺蔽矣

災異陳言疏

題為災異陳言事竊惟君德莫重於體元天道不虛以
示戒陛下改元伊始而上天示戒非常此固天心仁愛
欲陛下省懼也然我之省懼者或不以實則天之仁愛
者尤不可恃安危之兆可為寒心邇者節奉聖旨事關

朕躬的自當體行事有當興革的各該衙門逐一開具
來說仰惟聖慮正欲務實以應天轉危而為安也臣待
罪言路且喜且懼謹以聖躬所當體行者言之若隆大
孝勤聖學節遊樂遠佞倖是已以時事所當興革者言
之若振因循懲玩法備勅寇勵士節是已夫天地者陛
下受命之父母先帝與皇太后陛下生身之父母故事
天之道不外於事親得親之心斯可以得天矣伏望陛
下勤詣靈几躬禮宗廟近思先帝教育之恩遠念祖宗

積累之德又常朝於太皇太后皇太后之宮曲盡母子之情樂聞訓告之益使愛敬之念日夕在心乃所以隆大孝也至於講學一事尤帝王圖治之本可以開聰明可以養心志從容便殿之中講論片時之會其事與視朝御膳等爾於聖體未勞也頃以暑月停止經筵日講顧乃專事游樂不避炎日陛下奈何舍有益而不肯為作無益而不憚勞也臣恐不忠之人有以先朝輟講為言殊不知先帝德性已成逸游素少陛下年方英妙豈

可借此以損至德伏望仍開經筵依舊日講使日新之
功有加無已乃所以勤聖學也他如射獵游戲往往使
人心意荒惑形神勞頓甚非所以保養萬壽自求多福
也千金之子猶坐不垂堂陛下以宗廟社稷之身豈不
自愛哉良由左右前後不得正人希寵導非迷君誤國
此游樂固不可不節而佞倖尤不可不遠伏望明詔中
外放鷹犬絕玩戲仍簡選內臣求其端謹者以充侍從
斥其姦巧者以為懲戒務俾游樂有節而佞倖不得近

凡此皆聖躬所當體行之大者也天下之患莫甚於因循因循不振則國政日弊近該戶部奏准欲行吏兵二部查革冗食及行光祿寺查勘內外濫費足國裕民莫急於此而乃累旬決月不即奉旨舉行部寺猶然諸司何責京師如此藩郡可知伏乞降旨切責各令逐一查奏從宜裁省斷在必行庶幾人心知警而因循可振也朝廷之患莫大於玩法玩法不懲則主權下移近該戶部奏准查勘草場以補國用兩次差官奉有成命太監

甯瑾乃敢無故奏沮若謂不宜更改待各官勘回取自
上裁未晚也若謂永樂以來地土則國家政務隨時損
益者孰非永樂以來事哉此其徇私罔上情罪顯然伏
乞特勅法司究治庶幾威權不失而玩法可懲也方今
北敵窺伺於三邊遠夷竊發於雲廣蘇松近地海寇嘯
聚江西四川時各有警皆由處置失宜以致猖獗至此
夫用力攻戰固在將官而運籌調度多在憲職往時巡
撫起自陞用者率與邊警處所及其頗積年勞漸轉內

地旋擢在京此但為人擇官非為地方任人也今西北
邊設立總制最為得計各處巡撫亦既有人合無今後
察其不堪邊寄者取回別用果有文武長才者特加久
任秩滿則如其官有功則錄其嗣債事則治其罪除遇
丁憂致仕方許推補仍勅廷臣秉公議處使得展布以
圖功不致苟且以避事如此而敵寇不靖臣弗信也臣
又聞禮義廉恥是謂四維四維不張何以立國蓋國家
必養廉恥之士而後能得忠義之臣伏覩大明律及欽

定條例文武官犯公罪並許收贖守衛上直軍校犯笞杖罪俱令納鈔婦人應決杖者非姦罪不去衣此我祖宗仁至義盡扶持四維也且廷臣密邇清光不啻軍校賢者守身不異貞女近見小有過犯多受刑辱臣竊傷之乞勅法司叅詳律例通行三法司鎮撫司凡常朝官員過犯非係贓惡無得去衣加辱庶幾全君臣之大體興禮教於無窮其於國家非小補也凡此皆時務所當興革之不可緩者也臣仰荷聖明叨備耳目遭時多事

深切憂惶用是昧死瀝誠仰裨萬一惟陛下垂聽而實行之以荅天意以慰人心宗社幸甚愚臣幸甚臣無任悚懼激切之至

求封疏

題為求封事先該安南國故國王黎灝孫黎暲及國人奉表奏請求封該禮部題准差臣等充正副使於正德七年二月初六日領節及奉詔書勅諭并欽賜皮弁冠服一副常服一套前往本國封黎暲為安南國王臣等

行至廣西南寧府地方移文憑祥州令其馳報本國以
正德八年正月十七日入其國黎暕差頭目黎德富等
四員并通事人等至界首關迎接臣等授以儀注令馳
付所司遵行二十三日黎暕差頭目黎儀等四員來迎
又差頭目阮時雍等三員呈送儀注中間有疎繆處臣
等因指示曉諭之令其改正二十五日黎暕率其官屬
軍伍人等至呂瑰站迎候詔勅入站行禮畢退與臣等
行禮而返二十六日黎暕至富良江邊迎候詔勅至其

府中開讀行禮畢臣等以詔書付所司頒行國王黎暉退與臣等行禮具茶酒相勞送臣等出就館當日國王至館來訪仍率其頭目懇留詔書以為鎮國之寶臣等遵題奉欽依事理聽其請留二十七日請宴後殿宴畢臣等遂辭以明日早行當日國王遣頭目黎廣度等二十員齎書具贐禮送正使金四十兩銀六十兩副使金三十五兩銀五十兩生金各二十兩相金犀帶各一條相銀香帶各一條牙笏各二件沉香各五斤線香各五

百枝生絹各一十疋牙梳各五副竹扇各五十把家人銀各五兩生絹各一疋臣等俱辭不受二十八日國王至富良江邊具茶酒相餞送臣等登舟仍遣頭目黎念等五員護送另具書遣頭目黎鴈等二員將前項贐禮齎送至呂瑰站臣等固辭之二十九日復遣追送前贐至市橋站臣等終辭之乃已二月初八日頭目黎念等送至關而回臣等看得安南國地方僻小風俗鄙陋雖習尚詭譎而其敬事天朝以及使臣之禮則靡所不

至如各站遣人迎接每日三次館待所過地方刊木修路臨回遠送不敢或替此皆皇上德威遠布之所致也臣等除將原領詔書筒并節照例另繳外謹具題知

劾違例朦朧奏聞疏

題為違例朦朧奏聞事照得南京工部龍江瓦屑壩二抽分竹木局每年各季分收放過竹木等項數目例該造冊具本批差吏典齎赴本科本科官於御前引奏送科查理我國家成法具載大明會典所以防欺蔽稽出

金史卷一百一十一
納者百數十年於茲矣正德十年三月十三日該通政使司左通政劉達等送到龍江瓦屑壩二局各奏二本俱奉聖旨工部知道臣等看得前項本冊不由本科引奏事違法例情涉朦朧所據該局大使童輝鄧崇及原差攢典曾必虎王仕乾俱合有罪及照左通政劉達等一槩奏送亦難辭責乞勅法司究治庶幾欺蔽知警而出納可稽矣

公糾劾以嚴考察疏

題為公糾劾以嚴考察事竊惟朝廷考察以儆庶僚必藉糾劾以明公論是以去留允當臣工罔私此我祖宗良法美意所以制治而保邦者也舊例六年一考京職凡五品以下令吏部會官考察其堂上官令自陳以須上裁至於小臣苟容大官倖位又許科道劾奏國家重典行之有年近該吏部會考諸司沙汰不職然漏網之魁間亦有之大臣自陳取應故事陛下恩禮優容淑慝未別夫魁惡不除何以勸善大臣不簡何以表衆臣等

叨任耳目不敢緘默謹舉不才之尤衆議共醜者為陛下數之某某云云此皆考察所不及清議所不容臣等秉公推恕求其可留而不得始敢其實以上聞也伏望皇上俯垂離照特賜乾斷將甯杲等照例罷黜庶幾奸邪不得以妨賢臣庶可期於稱職矣

慎興作以隆治功疏

題為慎興作以隆治功事竊惟聖王之圖成功者不作無益害有益其不得已而取諸民也則用其一緩其二

是以民不告勞功克就緒天休為之滋至國祚綿於無
疆我祖宗列聖之創守與皇上之繼述率是道爾頃者
營建乾清坤寧二宮所以復祖宗之規正宸極之位垂
燕翼之休誠不得已之舉非若離宮別殿無益而可已
者也陛下猶且重於用民命廷臣集議至再此即大禹
卑宮室文王戒勿亟之心也天下臣民孰不感激願効
其勞哉近該內官監奏行工部修蓋太素殿天鵝房船
塢等處錢糧動經巨萬軍匠不下數千臣等聞知不勝

駭懼續該本部執奏欽奉聖旨這工程還著該衙門查
理緩急來說臣等又有以見陛下慎重之心甚惓惓也
請以今日之事理論之茲役之興有四不可夫天下之
財力有限二宮之營建方始寬一分則得一分之濟早
一日則享一日之安各處見興之役尚須促完以趨大
工諸凡不急之務豈宜併作以妨大計此不可者一也
況邊陲之軍儲告匱內外之冗食益繁山東河南近經
兵燹江西四川未復瘡痍即今大木採及於遠方工料

派遍於天下若復別興土木誠恐民不堪命此不可者
二也近來京師風俗過奢物價騰貴豪右逞其僭踰小
民艱於生理兼之舊冬少雪初夏大雹收成缺望盜賊
生發或白晝驅馳或開巷劫掠民窮盜起可為寒心節
用愛人正在斯際此不可者三也古昔帝王非無臺池
以供遊觀然其作以時其遊有節故民樂其樂天眷其
德考之月令當夏毋起土功毋發大衆今時既不宜矣
况大內遊玩之處頻年營造不少必欲繼作尤非樽節

之道此不可者四也臣等職叨耳目事當論諫苟有見聞不敢緘默伏望聖明察納愚忠俯從衆議特降勅旨將太素殿等處免其改作一切不急工程俱令停止仍令各該衙門查處前項時弊於奢僭則申明禁之於盜賊則設法捕之於冗食則斟酌裁之於軍儲則措置給之將見人心悅而天意順不惟宮室之大工易成而國家之治安可長保矣

此疏
留中

備用馬匹疏

奏為備用馬匹事據直隸和州申

云

及據直隸滁州

申

云

案查前事本寺遵奉兵部劄付已經通派去後

今據前因臣等照得滁和二州災傷委的不減廬鳳淮揚等處其土產馬匹矮小委的不堪交俵多致揀退荷蒙皇上軫念地方痛恤民隱特從該部議擬將今年廬鳳等府江浦等縣馬匹改徵折色文移所至萬口稱便惟滁和馬匹仍存本色是以小民懷同仁之望伸無盡之情竊計二州應納馬匹自朝廷視之為數不多自二

金定四庫全書
卷一
州饑饉之民視之其徵買解俵掛欠追賠之累所係甚重伏望皇上俯矜下情特勅該部議處合無將滁和二州本色馬匹比照廬鳳等處事例暫改折色不惟官得實用抑且民免貽累實為便益萬萬矣

自陳乞休疏

下

奏為自陳乞休事臣以菲材叨登弘治十五年進士改翰林院庶吉士尋丁母憂弘治十八年授兵科給事中
正德三年逮杖於午門前黜為編民正德五年劉瑾敗

戮仍蒙朝廷起用歷陞工科都給事中正德十一年陞
南京太僕寺少卿萬死餘生再登仕籍論諫無益於當
時尸素尚叨於今職入仕垂二十年行年四十有六俛
思履歷奚補涓埃恭遇聖明紹統政化一新率土臣民
歡欣願治若臣者亦宜勉策駑駘仰圖報稱奈何空疎
褻拙力不逮心况遭患難以來血氣衰耗每遇陰雨兩
腿隱痛艱於動履若復昧於知止罪益大矣茲奉明詔
許臣等自陳乃敢吐露肺腸陳乞骸骨伏望聖明垂察

賜之休致使臣得與田夫野叟謳歌太平以終餘年莫大之恩莫大之幸也臣干冒天威不勝戰懼為此具本專差義男潘亮親齎謹具奏聞伏候勅旨

均恩例以蘇民困疏

奏為均恩例以蘇民困事伏覩詔書內一款浙江等處十三布政司并南北直隸嘉靖元年分內除漕運糧斛四百萬石照舊徵兌起運其餘夏秋稅糧馬草農桑人丁絲絹布匹絲綿花絨屯田皇莊莊田子粒牧馬草場

子粒租銀及甲丁二庫蠟茶銅漆銀硃等料不分存留
起運以十分為率俱免五分以蘇民困欽此竊照各處
牧養種馬或論田地或論人丁每年派取備用馬匹各
照丁田朋納是田地以納馬為稅糧而人丁以納馬為
徭役較之他處丁糧名異而實同也今嘉靖元年稅糧
人丁等項俱免五分遠近聞知懽呼感戴獨備用馬匹
係該臨期奏派小民未知蠲免分數不無缺望伏望皇
上一視同仁特勅該部計議合無將嘉靖元年備用馬

匹查照常年額數減半派取惟復分作二年減派亦免
五分之數則恩例無不均而窮民無不獲矣臣等又思
漕運糧斛照舊徵兌乃取足於五分既免之外此項馬
匹若不減免是取足於十分全徵之內故明詔止除漕
糧其餘俱免五分為恩至渥為慮至悉也仰惟聖明御
宇聿興虞周之治凡百貨財悉歸公帑萬姓悅服四夷
嚮風誠千載一時也為今之計寧使馬欠取辦於公帑
無使恩推不均於小民況邇來邊軍交兌漸少官馬寄

養頗多總計一年減免五分不過一萬二千餘匹皇上富有四海豈獨靳此而不期副大賚之初心哉臣等猥係職司不敢不豫言之惟陛下矜察天下幸甚緣係均恩例以蘇民困事理未敢擅便為此具本順差典吏劉堂親齎謹具奏聞伏候勅旨

照例暫處掛欠以稍減重併疏

奏為乞憐災傷照例暫處掛欠以稍減重併事准本寺寺丞吳天挺牒據直隸滁州申為照本州里少民貧差

繁賦重兼以災傷頻仍民困已極緣本處不係產馬地方遞年備用大馬徵銀召販收買起俵到京每至揀退回還一馬不堪換買三四次者有之一年解俵併徵三四年未完者有之今查正德十一年仍掛欠馬一十匹正德十二年欠馬一十二匹正德十五年欠馬五匹正德十六年欠馬一十九匹俱經數次買換節遭揀退經該官員累年住俸槩州百姓盡至破家今當災傷之年縱使忍心追併買馬到京未必全中不免仍有揀退之

苦卷查正德十一年間為暫處掛欠以稍減重併事該
蒙南京太僕寺牛寺丞奏兵部覆題內開正德十年以
前其揀退不堪馬匹選委廉幹官員變賣價銀差人解
部轉發太僕寺收貯買馬支用今本州與屬縣正德十
六年以前掛欠之數補俵不完伏乞憫念地方凶災百
姓疲困轉為具奏合無照正德十一年奏行事例變賣
銀兩解京庶公事得完卷宗杜絕民困少蘇等因到職
據此查得前項掛籌馬匹非獨滁州一州為然其餘淮

安等府和州等州縣亦有掛欠節經解俵退回追補未完若不移牒煩為查處具奏照例改徵折色解補則節年拖欠未免重併等因到寺臣等照得各屬掛籌馬匹數雖不多然重復買解再三退換之累民實不堪况聽民折價則積年之欠易完而收銀在官則止產之馬易買伏望皇上俯矜下情特勅該部議處合無將前項馬匹查照先年事例變賣價銀解部惟復照依折色每匹納銀一十八兩領取原批則官民兩便矣

竹澗集奏議卷一

欽定四庫全書

竹澗集奏議卷二

明 潘希曾 撰

都臺九首

災異疏

題為災異事據廣東韶州府申稱嘉靖四年十二月二十四日夜四更時分忽有電光閃爍自東南來雷震有聲凡四次後雨下如注雷聲乃止為照雷電發於春轟

於夏蟄於秋收於冬乃今季冬之月雷電異常上天垂戒不為無意又據江西贛州府申稱嘉靖四年十月以來一向多雨至閏十二月二十二日大雨微霽本日起至二十四日每酉時分滿天赤雲照映牆壁俱見紅色二十七二十八日酉時赤氣仍前看係災異合就申稟各報到臣據此看得變不虛生天實示戒除臣痛自修省及行各省并該道府衛所縣等衙門一體修省以弭災變外緣係災異事理為此具本專差千戶楊忠親齎

謹具題知

遵勅諭陳利弊以消天變疏

題為遵勅諭陳利弊以消天變事查得接管卷內准戶部咨該廣東按察司副使徐文溥奏內開疏鹽法查得先因兩廣軍餉不足奏准廣鹽於南雄府抽分許行南贛發賣繼因南贛軍餉不足奏准廣鹽於贛州府抽分許行袁臨吉發賣官民便之正德十三年三月內該本部題准廣鹽止許南贛發賣其袁臨吉三府不許擅便

行賣違者照例問罪司國計者必有深見但淮鹽逆流而上三十餘程腳價反重鹽價反輕商船經年不來而廣鹽止越一程順流而下其勢甚便袁臨吉人民欲仰給淮鹽不食廣鹽其可得乎夫淮鹽廣鹽皆國家利也民隨時變易可行於南贛則亦可行於袁臨吉矣臣又訪得廣鹽自南安過嶺下貢水者多係拆賣有引官鹽稱為大路自石城過山下章水者係肩挑無引私鹽稱為小路一入贛江則官私莫辨又有畏懼南雄府太平

橋查盤俱從小路越信豐縣橫田江九渡水徑裝表臨
吉地方貨賣即欲禁革人民缺鹽嗟嘆何堪又況販鹽
之徒豈肯棄其世業重法誅之亦難禁止贛州雖設橋
船防禁秋冬水落則賂通把守賣放權貴囑託公差夾
帶弊且百出春夏水漲衝散橋船則聚衆連艘執持器
械乘勢徑度巡邏防守勢不能支於是乃有抽分之議
以為不抽分則利歸姦雄之手官失自然之利然既係
私販則法當禁捕乃從而征之是取之於盜賊也可乎

頃因廣東軍餉缺乏鹽課虛耗特勅專官管理法固善矣然不濬其源而徒塞其流耳臣愚以為法既不可禁不若因其勢而利道之如蒙乞勅戶部計議查照題准舊例行令廣鹽照例南雄府納稅許行袁臨吉三府發賣經過贛州量行抽分以備軍餉該府年終將用過餘銀解部支用如此則廣鹽得以疏通私販以之自息民獲利濟而國用日裕矣前件查得先該欽差提督南贛汀漳等處軍務都察院右副都御史聶某題為地方事

據江西按察司整飭兵備帶管分巡嶺北道副使王度呈前事照得江西一十三府先年俱係行准鹽地方後因廣東用兵軍餉無資議抽鹽稅將廣鹽奏准行南贛二府後又因南贛用兵軍餉無資議抽鹽稅又將廣鹽奏准行袁臨吉三府今廣東之抽分仍舊南贛之抽分停止則廣鹽止當行於南贛而不當行於袁臨吉本道已經呈奉提督南贛汀漳等處軍務都察院右副都御史聶明文存留橋關禁止廣鹽不許越境販賣但行之

已久今奉停止則商人有本折之苦地方有鹽騰之害
兼且把關人役姦弊紛紜巡邏官員詰捕旁午本道日
益多事伊欲稍從假貸任其下流則無藉鹽徒乘其厚
利興販前鹽散入南直隸蘇松等處沮壞淮鹽本道亦
難辭責為今之計合無於贛州龜角尾照舊開廠止抽
廣鹽一件許行表臨吉三府發賣其餘貨物不必再抽
庶乎商民得販鹽之利窮民得食鹽之利江西之軍餉
有資廣東之官鹽無滯似於地方有益等因到臣卷查

前項抽分該前都御史王遵奉詔書停止外今據前因切照袁臨吉等府原非行廣鹽地方先年南贛二府賊盜生發錢糧無措奏准下流各府發賣抽分稅銀以充軍餉因此十餘年來彼處居民以食廣鹽為便各處商人以販廣鹽為利今一旦遏止委的民興無鹽之嘆商失經營之利衆口嗷嗷羣聚告擾且南贛地方界連三省盜賊淵藪今雖頗寧不測之患難保必無軍餉之用不可不備況江西各府節遭荒旱衛所官軍月糧屢年

不得開支甚切匱乏之憂如蒙皇上憫念地方俯順商民之情乞勅該部議處准令將廣鹽照舊疏通於袁臨吉三府發賣每季行委隔別府分廉能佐貳官一員管理抽收稅銀貯贛州府庫聽候軍餉支用有餘助給官軍月糧等項之乏其餘貨物俱免抽分聽臣嚴督守巡等官查革姦弊年終造冊繳部查考等因奏奉聖旨該衙門知道欽此查行間今副使徐文溥又奏前因看係一事況所見相同揆之民情土俗似亦便順但於例未

宜及事在彼中遽難定奪合行撫按衙門再行議處停
當徑自奏請施行等因又查得先准本院咨為順人情
宜土俗以通鹽法以充國賦事該巡按兩廣監察御史
曹軒嘗奏言之續准本院咨為承詔敷陳軍民利病以
恢弘聖治事該巡按江西監察御史黎貫亦奏言之又
該前都御史聶會同廣東清軍監察御史楊銓議照袁
臨吉三府雖係行淮鹽地方水逆灘險鹽船不到自奏
准開抽通廣鹽以來彼處軍民惟食廣鹽商人得利興

販日衆近奉例禁革民缺鹽商失利情甚不堪揆之理勢誠不可以不疏通等因咨院及據江西布按二司守巡嶺北道左參政王大用兵備副使林大輅呈稱訪諸鹽商自南雄太平橋攤稅般至信豐縣九渡水下船徑抵贛河商樂其便而南安則惟章水一支河道紆淺兼以折梅亭換夫頗費脚力商人就此者少又瑞金石城小路之鹽自福建汀州而來俱舟入貢水亦為違禁若在南安抽分則信豐各縣所過之鹽俱得不稅合無查

照舊規准將廣鹽許行表臨吉地方發賣於贛州龜角
尾官廠照例抽稅於東西浮橋如法啟閉每季於隔別
府分坐委佐貳官員前去管理驗有廣東南雄府票照
曾經太平橋稅過每鹽十引抽一引半其餘無票者每
鹽十引抽二引折收價銀送贛州府貯庫以備軍餉支
用及南贛各衛所官軍月糧并各縣隄備官軍口糧缺
少湊支每季贛州府將抽過銀兩數目備申合干上司
衙門查考臣惟御史曹軒等奏議率與咨內事理相同

參政王大用等所呈亦似議處停當利民裕國足為良法況廣鹽先年通行於表臨吉未聞鹽法有礙近年止行於南贛未聞淮鹽有來若不仍照先年疏通徒使私販益衆官捕益勞利歸漏網之夫而鹽食愈艱禍起拒捕之輩而事勢可慮抑且軍儲無資緩急無措非計之得也伏望皇上軫念下情俯從輿論特勅戶部計議施行地方幸甚緣係遵勅諭陳利弊以消天變事理未敢擅便為此具本順差千戶楊忠親齎謹題請旨

請揀京營積弊以備不虞疏

題為請揀京營積弊以備不虞事准兵部咨該吏科給事中楊秉義題該本部議題奉聖旨是都准議行欽此欽遵內開一慎將令切惟為政以用人為先御軍以擇將為急見今淮揚等處地方災傷重大民窮盜起勢所必至陝西咸寧甘肅等處又各有大勢敵兵出沒侵犯選將練兵用戒不虞誠為目前急務合無本部查照先今事理通行兩京五府各部都察院通政司大理寺各

堂上官并掌科掌道及在外巡撫巡按布按二司等官
文書到日限一箇月以裏各從公保舉謀勇廉能軍職
官員不拘邊方腹裏寒微世胄開具履歷實跡徑自具
奏本部遇有領軍及坐營等項相應員缺斟酌推舉上
請簡用不許推托避嫌及濫保不實有負朝廷訪求將
材至意備咨到臣除軍職才績未著及詢察未真外訪
得福建總督備倭都指揮僉事王翺弓馬素習而文事
兼通督備効勞而海寇遯迹湖廣守備郴桂等處地方

署都指揮僉事沈鸞先經征進而擒斬有功久任邊方而軍威克振江西贛州衛見奉查勘功陞都指揮僉事吳山年力方壯而累建軍功志操可觀而亦善騎射見奉查勘功陞都指揮僉事明德屢征寇盜而獲功已多素有勇謀而居閒頗久以上各官職雖不同才皆堪用乞勅兵部再加查訪果如臣所言將各官量才授任則將領不致缺人而軍職亦知所勵矣緣係請掾京營積弊以備不虞事理未敢擅便為此具本專差舍人謝珂

金史卷之二
卷二
親齎謹題請旨

擒斬反招點賊功次疏

題為擒斬反招點賊功次事據廣東按察司整飭兵備
兼分巡嶺東道僉事施儒呈為乞早發兵剪除反賊以
安地方良民事據守備惠潮等處地方以都指揮體統
行事廣州左衛指揮僉事程鑒并領哨惠州等衛指揮
等官高瑛等稟稱有名賊首賴貴張廷山張廷貴并甲
從賊人劉廷珠等俱已擒斬將盡雖有敗遁一二一時

難以搜扒乞行留兵戍守仍乞呈請掣兵等因據此案查先據惠州府歸善縣寬得都鄉老總甲被害民鍾明廣陳尚能等各狀訴稱桃子園首從強賊賴貴等反招聚衆劫殺人財擄姦婦女占奪田土等情已經會議備由通行呈稟及調集原借留操調達官火明伍宣等并指揮吳樹哨官軍與原顧募打手及附近龍川興寧海豐程鄉揭陽河源等縣地方慣戰鄉夫行委管操惠州衛指揮高瑛惠潮二府推官周楫李喬木龍川等所縣

千戶呂員朱鼎吏目吳增等官分領哨道尅期進剿又
因前賊遁入深險山峒仍催督原奉軍門督發截捕別
起流賊指揮雷潤哨官軍并達官亦卜刺因等併勢夾
攻隨奉軍門會批據本道會呈前事奉批議仰本道依
擬嚴督上緊勦捕務在事機縝密計慮周詳獲功解報
以靖地方重加獎賞毋容輕率怠誤貽害若究及奉提
督南贛汀漳等處軍務都察院右副都御史潘批仰嚴
督官兵追勦事平將獲過功次用過錢糧開報又蒙巡

按廣東監察御史涂相批看得殘賊賴貴等背招肆惡
為患地方亟宜勦滅動調官兵事宜悉依擬行務使賊
黨悉除獲功解報仍須戒諭督兵等官程鑒等毋得濫
及良民斯為善舉其合用錢糧徑自酌處事完之日造
冊繳報查考依蒙督據各哨官兵擒斬首從反賊賴貴
等一百七十六名顯俘獲賊屬婦女大小八十三口并
器仗馬匹前來會審閱實賊人賊級轉解賊屬權宜變
賣價銀添湊賞功器械馬匹給與兵壯領用餽養騎征

外又經催督各哨將搜山續獲賊人張廷貴宋亞黃等六十五名顆呈報在案今據前因看得前項惡賊賴貴等已擒斬二百四十一名顆雖尚有散遁餘黨數亦不多但山峒險遠林木障翳易於藏躲一時委難搜扒盡絕必須留兵防守庶免殘黨嘯聚之患合無將本道顧募打手五百名并留指揮雷潤哨官軍四百三十員名仍在桃子園柏埔地方屯劄緝捕殘黨護民耕種其餘官軍打手鄉夫民壯悉行掣散呈乞照詳等因到臣案

查先據守備惠潮等處地方以都指揮體統行事廣州
左衛指揮僉事程鑒呈為被強賊劫掠打騙銀兩搶檢
家財焚燒房屋等事據長樂守禦千戶所中該蒙分巡
僉事施儒案驗內開據潮州府呈據饒平縣滬洲都致
仕知州饒金家人饒二具狀訴嘉靖四年八月內有家
主前往本都安樂渡村收租本月二十九日早忽被強
賊一宗二百餘徒突來本村劫掠將家主綑縛搶剝租
銀七十餘兩家財衣服劫空仍劫大河壺水至三河巡

檢司前隔河地名東門埔白日放火焚燒民屋三十餘家殺死民人杜大曾二仔二命仍將家主綁到竹頭坑屯劄逼銀一百兩方纔釋放各賊於大麻村登岸去訖告乞轉達施行等因據此又據海陽縣地方總甲劉廷陽呈稱前賊在於饒平瀝洲都擄船過河突來到都擄劫鄉民陳文祐林大等家九月初七日至土名深村廷陽家住夜次日早將林大并經紀人賴大公殺死二命等因又據三河巡檢司申據饒金家人饒才告同前情

及據民鄧文譽吳瀚等告稱前賊打劫饒知州又劫東門埔曹永瑄等人財放火燒屋殺人流劫大麻一路人財殺死鄉民錢大仍擄男婦二十餘名口本司督兵追捕前賊擁入崑崙銅鼓嶂去訖等因到府轉呈到道看得前賊聚集二百餘徒流劫鄉村殺人燒屋勢頗猖獗若不疾早撲滅未免釀成大患除行委該府推官李喬木等督兵追捕外今訪探得前賊越往海豐縣地方流劫緣照該縣捕盜缺官兵力寡弱恐難支持該府捕盜

通判陶天祐年力衰憊亦難專責應合權宜暫委推官
周楫督捕案仰本所速行守備指揮程鑒統領惠州碣
石各衛所見在巡捕官軍并起取附近屯堡精壯軍餘
各備鋒利器械督同推官周楫兵壯打手人等黏蹤追
捕獲功解報施行依蒙備申到職切照惠潮二府地方
每遇秋冬流賊往往聚衆劫掠今據報稱賊勢猖獗若
仍於衛所起調巡捕并屯堡兵夫前去截遏尤恐兵力
寡弱不無誤事必須呈調經戰精勇官兵督發相機跟

捕方克有濟如蒙軫念乞發廣城下班休息達官二十
名殺手三二百名及歇班惠州衛指揮雷潤碣石衛指
揮房錦二哨旗軍協同附近地方兵夫分發併勢尋蹤
擒捕其合用馬匹錢糧之行守巡道議處備用等因具
呈前來續據分巡嶺東道僉事施儒呈為走報緊急賊
情事據潮陽縣申稱本年九月十七日被流賊江文生
等打劫貴山等都人財姦汙婦女燒燬房屋捉擄吉安
巡檢司巡檢施淵等因到道看係捉擄職官重情除嚴

督原委推官李喬木周楫并督發管操指揮高瑛統領
見在達官千長總小甲打手共一千員名前去追捕并
關福建分巡漳南道督兵把截各賊歸路及懸重賞示
諭兵夫用命舉事等因前來又續據僉事施儒呈為地
方緊急賊情事據領哨惠州衛指揮使高瑛呈前事蒙
本道紙牌備仰本職統領副巡檢練廷爵并達官千長
打手兼程前去隨賊向往黏蹤追捕務將前賊全夥擒
捕盡絕奪回被擄官員獲功解報依蒙統領副巡檢練

廷爵并達官千長打手共一千餘名到於地方梅子坑
據緝事打手走報流賊約有一百餘徒越來下剝雙頭
畔田等村打劫民人張宗廣等家等因隨即統兵跟蹤
追捕前賊聞知驚懼先將原擄去吉安巡檢司巡檢施
淵脫放遁往地名梅林河埠擄船駕到黃牛渡隘上登
岸放火燒燬本隘突入十二都巡檢司屯劄本職探得
濮溪都地名葵潭係是衝要水陸要路督兵到彼截遏
設法出奇分兵河埠四岸裝伏前賊駕船七隻開裝旗

號灣船執旗上岸迎敵彼職督兵交鋒對敵當有千長
曾元魁等衝鋒破陣被賊戳傷衆兵奮勇向前當陣擒
斬打旗賊甲并賊都總江文生黃環等及戳傷數多各
賊敗走兵夫追逼俱投葵潭河中淹沉難以斬取首級
共擒斬獲賊人首從六十九名顆俘獲賊馬三匹奪回
被擄船大小七隻省令舊役老人賴伯壽并鄉民李昭
收候聽取等因又據揭陽縣千長蕭璋呈解賊級一顆
長樂縣地方排年李元美等呈解生擒賊徒陳元達等

六名賊級一顆各到道審閱明白今將擒斬首從賊人
賊級七十七名顆呈解審閱施行等因及該軍門批發
蒼梧道巡守官查審閱驗續據巡守嶺東道僉事等官
施儒等呈為乞早發兵剪除反賊以安地方良民事據
惠州府歸善縣寬得都鄉老鍾明廣總甲官佐民人石
記全陳尚能謝本明各具狀訴稱被桃子園殘賊賴貴
蕭廣朱曰廷張廷山等糾合三百餘徒反招聚衆開張
黑旗鳴鑼放銃劫殺人財荼毒地方本年七月內將良

民張文興等一家并朱亞狗殺滅八月十九日捉擄陳尚能妻朱氏陳細娘逼銀贖命九月二十九日殺死陳尚成譚氏等命捉擄陳尚雄石原深等入巢打逼不知生死姦占闕氏并女二口為妻日逐大肆去劫抄掠鄉村人財良善拋棄產業逃命山林況今冬熟不能收割妻兒失食告乞急救倒懸發兵勦捕以靖地方民賴安生等情據此查得先因桃子園賊首李文積等反招聚衆劫殺人財占奪田地已該分巡僉事施儒會同前帶

管分守左參議徐度勘議明白備由通行呈奉三府并
提督南贛軍門及蒙巡按察院等衙門批行動調漢達
官軍兵壯行委守備指揮程鑒統督領哨同知莫相指
揮等官劉璟等管領尅期擣巢勦擒渠魁黨從李文積
等一千七百六十餘功解報審驗處決外續奉撫按衙
門案驗批呈依奉將各哨官兵掣散仍行緝捕餘黨及
借留領哨惠州衛指揮僉事吳樹哨官軍哨守地方彼
因殘賊賴貴等狡黠逃匿深山搜扒不獲師還復出始

及一百六十餘徒隨據甲頭賴貴王廷珠等具狀赴道
告乞招撫時值春耕暫行俯順牌仰巡檢楊漢押帶賴
貴等各還原居本分耕種仍處給口食牛種安插停當
造冊回報在案今告前因叅照殘賊賴貴等與李文積
等同夥為盜征勦漏刃既經撫處安插即當改過自新
乃敢復肆兇頑糾集醜類劫殺人財擄姦婦女逐散良
善占據田產遂致告訴紛然警報日聞若不疾早撲滅
未免釀成大患又該各職督同守備指揮程鑒議照前

賊積年狡黠巢穴星散若只一路進兵未免東追西竄
隨會案將見在召募及借留長樂團操達官打手并添
調附近歸善長樂程鄉興寧等縣慣能殺賊敢勇鄉夫
共四千餘員名行委惠州衛指揮高瑛楊昂惠潮二府
推官周楫李喬木龍川千戶所副千戶呂員吏目吳增
程鄉縣主簿陳政等官分領哨道仍行守備指揮程鑒
統督尅期並進夾攻勦捕欲候呈請至日方行舉事緣
程途遠涉往返日久恐機事預泄則賊得為備功難速

成除一面督發各該官兵追勦前賊獲功之日另行解報外今將緣由具呈照詳等因前來已經批仰嚴督官兵追勦去後續據巡守嶺東道僉事等官施儒等呈為擒斬反招點賊功次事內開據指揮高瑛哨生擒賊首賴貴賴富賊徒謝德勝等共三十四名斬獲賊級四十三顆俘獲賊屬劉氏等大小共七十七口奪獲賊馬三匹推官周楫哨生擒甲從賊人王大等四十五名斬獲賊級四顆俘獲賊屬張氏等四口推官李喬木哨生擒

賊首張廷山賊徒廖亞伯楊阿琳等共三十六名斬獲賊級十顆奪獲賊仗腰刀二把槍一根馬一匹禽書一本黑紬旗一面千戶呂員吏目吳增哨生擒賊徒張廷興等五名斬獲賊級三顆千戶朱鼎哨擒獲賊人伍世寬等四名斬獲賊級三顆把截要路巡檢楊漢擒獲賊徒鄒叔仔謝鸞等二十三名俘獲賊屬二口巡檢楊通擒獲賊人二名唐從貴沈亞二驛丞鄭文秩擒獲賊犯一名塗明主簿謝鏜擒獲賊徒江大等五名各前來審

得賊首賴貴賴富等甲從賊人劉廷珠等六十六名并
審究因傷中途身死首從賊人張廷山等四十七名及
就近斬獲賊人劉禽總等首級六十三顆共一百七十
六名顆各委的先投在李文積等手下為盜大征脫捕
後隨同賴貴等聽撫反招劫殺張文興等家人財占奪
田產等情是實取具口詞在案賊級委千戶魏騰高等
閱驗真的及審得解來賊人數內朱亞長等四十二名
各執詞有稱係近投入在彼耕田者有稱在彼附近居

住者俱不曾為盜等情及數內朱亞長等三十名俱有
該圖里老見在證審果係良善當即釋放其劉廷聚劉
廷器黃明何木旺廖舉李元真李亞長鍾彪葉四九名
止係一面之詞劉湯旺梁金保陳學仔三名跡涉疑詞
俱係事干強盜重情遽難輕信發回該管河源等縣速
拘里排親鄰審勘并將器仗馬匹給與見操兵壯領用
餵養騎征賊屬權宜酌處就彼變賣價銀入官添湊賞
功及丹嚴督各哨官兵搜扒敗逃餘黨盡絕另行解報

今將首從賊人賊級共一百七十六名顯呈解審驗施行等因及該軍門批仰蒼梧道分守官會審閱驗去後今據前因臣會同提督兩廣軍務兼理巡撫都察院右都御史姚鏌總鎮兩廣等處地方內官監太監鄭潤鎮守兩廣地方總兵官征蠻將軍撫寧侯朱麒巡按廣東監察御史涂相議查得別卷一宗為陳言地方利弊事節該兵部看得巡按御史高公韶奏稱廣東之盜宜於撲捕而不宜於大征備言撲捕之有益與大征之有害

切緣廣東之新寧清遠白水後山恩平陽江綠水羅傍河源龍川等處委的盜賊淵藪常年竊發不能斷絕撲捕於始發則用力易而為費少俟其猖獗而後調兵征之則用力難而為費多合無今後地方但有盜賊竊發即便督行守巡兵備等官設法撲捕不許遷延怠忽釀成大患其有功績顯著者亦與其實奏聞以憑議擬陞賞不許勢要子弟捏名插報若果賊勢重大相應大征亦須指定地方賊首姓名不許含糊延蔓惟圖報功莫

辨玉石其有相應撲捕而不行早處必欲養亂自利者
許巡按御史指實劾奏等因題奉欽依備行前來通行
欽遵外臣等為照廣東惠潮二府饒平長樂等縣接連
福建江西地方三省交界萬山盤礴谿徑聯絡多歧延
袤數千餘里自昔流逋嘯聚動成大患今流賊江文生
等敢以烏合之黨類流劫良善之鄉村殺擄人財而肆
無忌憚姦汙婦女而白晝橫行拒敵官兵捉擄職官驚
駭郡邑兇惡特甚若非早為殄滅必將流禍於四方反

賊賴貴等本該桃子園之殘黨復踵李文積之故智據
舊巢而兇殘大肆眇官司而劫掠盛行殺人放火無所
不為占產奪婦特其餘事若非急謀蕩掃亦必貽釁於
他日今分巡僉事施儒乃能運謀設策籌畫有方於流
賊江文生等既已剪其萌芽賊黨為之遠遯於叛賊賴
貴等亦復擣其巢穴賊壘為之漸清俘馘已踰四百之
衆靖寇用安兩郡之民且不多煩兵力亦無浪費錢糧
其功實為可嘉分守右參議汪思亦能同心督率協力

贊成計畫無遺進攻有備其功亦宜所錄再照守備以都指揮體統行事指揮僉事程鑒承委勦賊克効勤勞亦合優獎但恩典出自朝廷非臣下所敢擅擬伏乞聖裁除行該道守巡守備官將原調征有功官軍人等查照規格犒賞以勵人心及量留官軍打手在於勦過地方屯劄往來緝捕殘黨護民耕種其餘盡行掣散放回休息外緣係擒斬反招點賊功次及節該兵部題奉欽依備行但有盜賊竊發即便督行守巡兵備等官設法

撲捕其有功績顯著者亦與其實奏聞議擬陞賞事理
未敢擅便為此具本專差舍人劉高親齎謹題請旨

議處守備官員疏

題為議處守備官員事臣惟南贛乃多事之地守備為
禦侮之官安攘之計擇將為急訪得守備江西南贛二
府地方都指揮僉事康英年力衰憊動履艱辛徒取素
餐之譏難責奮武之效且聞本官亦嘗奏稱有疾乞回
調治此其自知之明不可一日安乎其位者也又訪得

江西贛州衛指揮使陞都指揮僉事吳山明德之二臣者並當壯年而累建軍功俱有謀勇而習知土俗但因奉查功次在閒日久若以見陞職銜用之功次聽查或以原任職銜用之以都指揮體統行事則皆可備將領者也伏望皇上加察勅兵部計議合無將康英放回原衛以遂其私將吳山明德量用一員就近交代惟復別選將材速令赴任庶幾守備得人而地方有賴矣緣係議處守備官員事理未敢擅便為此具本順差舍人來

儀親齋謹題請旨

謝恩疏

奏為謝恩事嘉靖五年七月十二日准兵部咨為擒斬
反招黥賊功次事內開該本部具題奉聖旨是各官既
能擒斬劇賊巢穴盡空其功可嘉鄭潤姚鎔朱麒潘希
曾涂相各賞銀二十兩紵絲二表裏施儒汪思程鑒各
賞銀十五兩紵絲一表裏欽此欽遵移咨到臣本月十
七日贛州衛舍人來儀於禮部順領花銀二十兩大紅

織金獬豸紵絲一表裏素紵絲一表裏齎送到臣除欽
遵望闕叩頭領受外伏念草竊就殄邊陲稍安藉兵力
以有成仗天威於無外雖嘗指示實匪賢勞乃蒙溫旨
褒嘉槩與賞功恩典白金頒內藏之寶拜捧生輝文綺
重華袞之榮被服思稱極逾涯分莫報涓埃尚當省厥
躬推之揚清激濁庶以修內治期於本固邦寧臣不勝
感戴天恩之至為此具本專差千戶李環親齎謝恩謹
具奏聞

守備缺官疏

題為守備缺官事照得福建守備汀漳地方以都指揮體統行事指揮僉事賈能因嘉靖二年五月內流賊劫掠長泰縣珪塘等地方該巡按衙門叅奏嘉靖四年十一月內提問隨該鎮巡衙門會委鎮海衛指揮同知徐麒暫管守備汀漳查得賈能緣事一年之上尚未回任就使問結而庸懦誤事亦難倚賴況多事地方苟非任用得人正其體統何以奮武弭盜訪得見委徐麒克効

勤勞福建三司守巡官考語類多稱其練達而可當一面江西贛州衛功陞都指揮僉事見奉查功吳山先嘗經臣保舉江西三司守巡官考語類多稱其勤能而武藝優長此皆可備推選者也伏望皇上俯察臣言勅兵部計議合無將賈能放回原衛以戒不職將徐麒吳山量用一員就近接管惟復別選才能速令赴任則官不久缺而事可責成地方亦得保障矣緣係守備缺官事理未敢擅便為此具本專差舍人李環親齎謹題請旨

議處兵備官員疏

題為議處兵備官員事照得湖廣整飭郴桂衡永等處
兵備自副使滕謚考察去任迄今一年新除副使尚未
到任該省撫按衙門始委分守上下湖南道右參政留
志淑帶管尋委分巡下湖南道僉事鄭光琬又委分巡
上湖南道僉事汪溱相繼帶管雖地方多故勢非得已
然往來不常交代無緒虛文遙攝顧彼失此且承委官
員未免遷延避難姑俟兵備之至而遂諉之也况郴桂

等處乃湖南極邊與江西廣東接連隸臣管內緣無專
管任事難以責成盜賊之行捕屢督未獲貪殘之發問
屢催未結雖臣亦日俟兵備之至而卒未至也地方廢
事深為可虞伏望皇上加察勅吏部計議合無將久除
不到副使作缺別處另擇廉能官員推補速令前來管
事地方幸甚緣係議處兵備官員事理未敢擅便為此
具本專差舍人來儀親齎謹題請旨

申明地方事宜疏

題為申明地方事宜事竊照南贛汀漳與惠潮南韶郴桂等處當江西福建廣東湖廣各邊之交萬山中峙而蠻寨雜居大海外薄而蕃舶時至盜賊之出沒無常招撫之叛服靡定雖地割四省而延袤數千里間賊情略相等也臣到鎮以來嚴督各該守巡兵備守備等官練兵備盜綏善禁姦雖鼠竊狗偷時就撲滅而恃險稔惡難保無虞使非先事豫防何以圖難於易查得兩廣鎮巡衙門與臣會本內開別卷一宗為陳言地方利弊事

節該兵部看得巡按御史高公韶奏稱廣東之盜宜於撲捕而不宜於大征備言撲捕之有益與大征之有害切緣廣東之新寧清遠白水後山恩平陽江綠水羅傍河源龍川等處委的盜賊淵藪常年竊發不能斷絕撲捕於始發則用力易而為費少俟其猖獗而後調兵征之則用力難而為費多合無今後地方凡有盜賊竊發即便督行守巡兵備等官設法撲捕不許遷延怠忽釀成大患其有功績顯著者亦與其實奏聞以憑議擬陞

賞不許勢要子弟捏名插報若果賊勢重大相應大征亦須指定地方賊首姓名不許含糊延蔓惟圖報功莫辨玉石其有相應撲捕而不行早處必欲養亂自利者許巡按御史指實劾奏題奉欽依備行欽遵一節臣惟先撲捕而慎大征深切廣東事宜如近勦惠潮叛賊賴貴等不甚費而易為功者正以此也但南贛汀漳郴桂等處皆與廣東接連事體相同前項欽依事理未蒙通行無以明示各該官司以作其奮武之心以懾彼姦宄

之氣似為未便伏望皇上勅兵部計議合無查照前項
欽依事理備行到臣督行各該官司一體欽遵庶幾事
可早圖兵知自奮而盜將聞風消沮矣緣係申明地方
事宜事理未敢擅便為此具本順差舍人來儀親齎謹
題請旨

竹澗集奏議卷二

欽定四庫全書

集部

竹澗集奏議卷三

詳校官中書臣孫溶

中書臣劉源溥覆勘

總校官知縣臣楊懋珩

校對官中書臣李荃

謄錄監生臣唐燦

欽定四庫全書

竹澗集奏議卷三

明 潘希曾 撰

都臺下六首

更任官員疏

題為更任官員事據江西南安府申稱所屬南康縣地
方衝要人民悍頑健訟知縣彭寅賦性純篤事難分理
况兼各項公務冗沓切照上猶縣民淳地僻知縣洗滌

年力壯強頗堪幹濟合無將各官更任管理庶乎才識各宜公務畢舉等因到臣竊照南康地要事繁非強幹之才莫任上猶地僻事簡則純篤之性所宜況彭寅到任已逾三月洗滌在任又逾二年其才性行事皆已可見故該府申請更任無非為地方計也伏望皇上勅吏部計議合無俯從所請將洗滌改南康縣知縣彭寅改上猶縣知縣則官使隨器而民牧皆得人矣緣係更任官員事理未敢擅便為此具本順差千戶陳琢親齎謹

題請旨

自陳不職乞罷黜以弭災變疏

奏為自陳不職乞罷黜以弭災變事近見邸報該禮部會奏脩省等因節奉聖旨兩京四品以上官著自陳竊念臣猥以疎愚誤蒙任使自受命以來將及二年於地方軍民之寄殊無寸補雖兢惕之心靡寧而災變之來未已況本年二月中嶺東殘寇竊發即令用兵剿捕勞民傷財實臣之罪如臣者蓋尤不職者也伏望聖明將

臣早賜罷黜委任賢能則人事克脩而天意可回矣緣
係自陳不職乞罷黜以弭災變事理為此具本順差舍
人劉高親齎謹具奏聞伏候勅旨

自陳乞休以嚴考察疏

奏為自陳乞休以嚴考察事竊惟朝廷黜陟之典所以
勵世人臣進退之道在於審已臣年五十有二竊祿兩
京歷官十任雖葵藿之誠向陽不改而蒲柳之質望秋
先零茲當一面之寄尤為百責所萃驅策不前瘝曠是

懼揆諸今年考察之例固應罷黜者也伏望聖慈賜臣
休致庶免重臣之罪臣無任瞻仰悚懼之至緣係自陳
乞休以嚴考察事理為此具本專差舍人來儀親齎謹
具奏聞伏候勅旨

謝恩疏

奏為謝恩事近准吏部咨該臣奏為給由事該本部覆
題查得臣歷俸三年考滿例應給由止該引奏復職見
奉勅提督前項地方軍務難以離任合無照例行令本

官就彼復職管事等因具題奉聖旨潘希曾准令就彼復職管事欽此欽遵備咨到臣除望闕謝恩遵依復職管事外伏念臣章句粗知才猷素劣謬膺風紀復詰戎兵連四省之邊疆徒慚坐鎮勤九重之南顧曷克少紓三載當考而績弗彰五十知非而分宜退乃蒙天地曲成不以草茅遽棄俾之復職俟其後功感懼益不自勝報謝莫知所措臣敢不鞠躬盡瘁期有補于明時偃武脩文以無負其所學為此具本專差百戶林思恩親齎

稱謝謹具奏聞

剽平流劫叛賊疏

題為剽平流劫叛賊事據江西按察司帶管整飭兵備
分巡嶺北道副使林大輅呈據贛州府衛同知伍佐指
揮使姚璽呈嘉靖六年二月二十九日抄奉欽差提督
南贛汀漳等處軍務都察院右副都御史潘鈞牌為地
方緊急賊情事先該調委江廣贛州南韶惠潮等府縣
衛所通判等官董鳴鳳等統領官兵各赴有賊處所夾

剿仍差官齎執令旗令牌催發并行各省該道守巡兵
脩守脩等官嚴督進兵令照前賊勢尚猖獗行仰各職
統領見操機打并黃鄉保葉芳等兵夫多方設法不分
彼此界限攻圍夾剿務期搗巢搜捕盡絕有功員役從
厚給賞其軍中事情不時差人馳報承委官員務要計
出萬全事圖必克以憑旌奏等因及蒙江西布政司帶
管分守嶺北道左參政方楷按察司帶管整飭兵備分
巡嶺北道副使林大輅案驗俱奉本院鈞牌前事遵依

統兵直抵龍南縣太平保駐劄本年三月初六日把隘
團長李諫等於小江口拏獲強賊一名張仕鉞十四日
伏路機兵溫珊等於程坑逕拏獲強賊一名王汝言把
截本府知事劉璣於陂頭隘擒獲強賊曹宗文等二名
馬二匹職等隨差鄉導分投爪探前賊俱在廣東和平
縣泃頭賊首盧源巢寨屯劄就於四月初五日統領安
遠縣知縣劉信龍南縣主簿蘇珪原發失事贛州衛指
揮劉鏜等官兵遵照軍門指授方畧直抵前巢初七日

各賊恃險迎敵我兵奮勇自卯至午連戰數合賊腹背受敵大敗擒斬首從賊人賊級鬼吹角譚天秀李聰即李鳳等一百七名顆奪獲黃旗一面腰刀長槍二百三十五件馬五十五匹將巢燒燬餘賊奔潰隨督各哨官兵於初八日追至九連山下攻圍曲潭石柘二巢斬獲賊級八顆奪獲槍刀四十六件當用火箭縱燒賊壘房屋三百餘間燒死賊徒男婦數多因火焚化不得割取首級餘賊漫散遁入九連山等處又奉本院鈞牌務將

殘賊搜捕盡絕遵休督發龍南縣陰陽等官廖思欽等官兵追至地名秋湖槽碓坑等處生擒甲從賊林危等二十四名又該原發失事贛州府捕盜通判董鳴鳳帶領家人董福等追至地名梅花寨等處生擒從賊劉汝觀等一十名主簿蘇珪在地名兩頭塘五花障嶺等處擒斬賊人賊級楊崇堅等二十六名顆俘獲賊屬何氏等一十八名口奪回被擄男婦劉奎謝氏等一十二名口信豐千戶所百戶雷雄擒獲從賊一名李大頭南康

縣主簿張仕擒獲從賊一名華浩龍南縣典史沈璇上
猶縣哨官尹志爵等擒獲從賊黃思紹等二名報効吏
鍾文等敵殺賊級一顆及督據龍南縣知縣臧志觀搜
捕賊人張孟猶等二十名前後奪獲刀槍二十三件除
將馬匹軍前給賞獲功人役器械給兵領用賊人賊級
男婦旗號俱解提督軍門發審外即令賊巢已空殘黨
俱盡地方寧謐前項軍兵遵照明文掣放訖并准守備
福建汀漳都指揮僉事吳山開報督率哨下官兵擒斬

賊人賊級二十名顆俘獲賊屬男婦七名口守備江西
南贛都指揮僉事明德開解賊犯劉經等五名及贛州
衛百戶俞洪盤獲賊犯一名羅二等因各到道會同分
守左叅政方楷案查節奉本院鈞牌備仰本道親詣各
該地方嚴督原調各官兵人等分投截殺隨賊嚮往追
趕合兵夾剿務期盡絕有功官兵本院從厚旌賞敢有
違誤定以軍法議處事完通將驗過功次用過錢糧造
冊繳報查考等因依奉嚴督各哨官兵人等夾剿及紀

驗造報續奉軍門批發各哨官兵擒斬首從賊人賊級
并賊屬男婦賊仗仰道審報依奉將首級驗明梟示生
擒賊犯審係情真無詞者解赴軍門審決其有詞及情
有可疑者俱行查勘明白呈允釋放俘獲賊屬男婦審
發贛縣變賣被擄及原不知情男婦給親認領贓銀九
兩五錢七分贓物一封黃旗一面并解到器械二十三
件俱發府貯庫解到牛馬一十一頭匹行令賣價入官
等因并據廣東按察司分巡嶺南道僉事劉喬呈為地

方緊急賊情事據韶州府呈先據翁源縣申報被和平
洲頭強賊盧源等突來包圍巖寨等情已經依奉鈞牌
行本府捕盜通判符錫領率千戶等官袁鏜等選集軍
壯鄉兵前去約會惠潮龍南官兵前進九連大山夾剿
續准本官陸續牒解擒斬賊首從李英等一百六十六
名顆到府已將見在黃政李清等九十四名并病故賊
首李英首級一顆俱經差人解赴南贛提督軍門斬獲
首級一十三顆與解出中途病故及監故共五十八名

俱斬取首級發翁源縣梟示賊屬五十五名口查得數
內黃氏等七名口并章奇解審外其湯氏等四十七名
口變賣價銀五十兩九錢馬四匹內一匹倒死三匹賣
銀四兩五錢緞絹綿葛布疋衣服共一百一十件賣銀
八兩零八分五釐牛一十七頭賣銀三十三兩其奪獲
器仗二十件隨給兵壯殺賊連將翁源縣變賣賊屬黎
氏等一十八名口價銀三十七兩五錢并追出賊銀解
送到府俱貯庫及查本官先准守備南韶都指揮僉事

孫瑛手本奉明文將原調官兵於本年六月初開日通行掣放等因又據南雄府呈稱行准委官推官趙珩牒稱奉委親詣各縣督率縣丞等官杜洞等起集打手鄉兵民快旗軍分布於各通賊要路把截及前往和平麻陂等處協剿緣無賊迹窩巢盡空隨將各哨兵夫查照掣放等因各到道案照先節奉欽差提督南贛汀漳等處軍務都察院右副都御史潘鈞牌并奉欽差提督兩廣軍務兼理巡撫都察院右都御史姚某會同欽差總

鎮兩廣等處地方內官監太監鄭某欽差鎮守兩廣地方總兵官征蠻將軍撫寧侯朱某及蒙巡案廣東監察御史蘇恩鈞牌案驗俱同前事依奉該本職會同分守嶺南道左叅政胡璉及守脩都指揮孫瑛親詣南韶地方嚴督原委通判符錫推官趙珩等各查照約會江西龍南本省嶺東等處官兵併力夾剿續奉南贛提督軍門鈞牌備行本道將各官兵斬獲首級徑自紀驗贓仗婦口從宜區處生擒首從賊犯解來軍門依奉該本道

看得見在翁源等縣督兵又備行南韶二府各掌印官
查照閱驗區處轉解續准守脩都指揮孫瑛手本奉南
贛提督軍門批查得九連山遯賊今已無多已經專責
嶺東道官兵捕絕守脩孫瑛既呈各兵搜扒無蹤仰將
各官軍兵夫通行掣放依奉等因又據廣東按察司等
衙門巡守嶺東道僉事謝汝儀左叅議周震呈為地方
緊急賊情事據守脩惠潮以都指揮體統行事廣州左
衛指揮僉事程鑑呈據惠潮府衛等衙門推官李喬木

周楫指揮王廷璋高瑛典史副巡檢等官林璧陳華練
廷爵等各呈繳部下千百長胡王龍并新民鄭志臯等
結狀前來案查先為前事已經遵奉統督各哨漢達官
軍打手兵夫協同江西官兵攻剿及陸續扒捕解報連
將結狀呈繳到道案照先奉南贛提督軍門兩廣三府
軍門巡按廣東監察御史各案牌批行申呈動調漢達
官軍兵壯打手鄉夫新民人等行委守備指揮程鑑惠
潮府衛推官周楫李喬木指揮高瑛等分作三哨前進

尅期搗巢夾攻剿捕尤恐異同又行程鑑總統續據守
脩等官程鑑等并和平等縣陸續呈稟申稱統督官兵
攻破賊巢新民李鑑等殺死賊首曾蛇仔即曾惟德等
及奪出被擄贛州府通判董鳴鳳和平縣主簿汪清男
汪權各哨官兵新民人等陸續擒斬首從強賊陳文奇
號名鬼吹角譚崇尚陳細面即陳積貴盧玩即盧源等
四百七十名顆俘獲賊屬男婦一百六十一名口奪獲
紅旗一面并賊仗牛馬解報前來俱經審驗明白通行

解報節奉欽差提督南贛汀漳等處軍務都察院右副都御史潘鈞牌仰道嚴督官兵日下搜捕盡絕取具各官不致隱漏結狀備由回報以憑將兵掣放又准總司關奉欽差提督兩廣軍務兼理巡撫都察院右都御史姚某批據守備指揮程鑒呈奉批兩廣之賊往往以招之太早殺之不盡以致兵馬方回賊黨復出每一再舉兵費十倍前事有監所宜痛懲仰守巡官即如程鑑所議措畫糧餉多方運謀坐委程鑑督兵搜捕必以賊盡

為期方得呈請班師如是力難偏致本省各道并江西該道官各須督率領兵官員併心協力求靖地方亦未得專取辦一人以坐誤事機等因及蒙巡按廣東監察御史蘇恩批據程鑒呈蒙批守巡兵備道會議通行呈奪依蒙通呈量將老弱兵夫先行揀放及節差人督責各哨官兵搜扒盡絕結報去後今據前因合無將各哨兵夫原係團操者掣回長樂與一時加調顧募之兵通行掣放等因隨據守備指揮程鑒稟報據惠州府衛推

官指揮等官李喬木雷潤等各督該哨千百長總小甲
陳仕旦等生擒賊首吳宙黃尚奇二名并前後奪獲沙
水牛七十八頭馬三匹奪回被擄男婦四十九名口俱
解分巡嶺東道審問轉報等因各報到臣據此查得先
據江西分守嶺北道左參政等官方楷等廣東守備南
韶都指揮僉事孫瑛各呈各該地方搜捕盡絕緣由已
於本年六月內將二道官兵先行掣放續於八月內將
嶺東道官兵併行掣放訖查先據江西贛州府龍南

縣揭帖稟稱嘉靖六年二月初五日據新興保鄉團保
長李大弘等飛報本月初四日五更時分有廣東強賊
一大陣突來本保地名秋湖李海輦等家殺人放火劫
掠家財捉拿人口未知退往何方隨行准典史沈璇呈
報果有廣東河源等處強賊約有五六百人大肆猖獗
屯劄未散該臣看得所屬地方招撫殘賊甚衆一夫竊
發則羣醜煽動必須速為撲滅庶免滋蔓就經委調贛
州府衛通判董鳴鳳指揮劉鏜等統兵剿捕間又據廣

東南雄府揭帖稟據始興縣申據朔源周所保長黃秀茂等呈稱嘉靖六年二月初六日有賊一宗約六七百人在龍南縣地方羅坊等處攻劫義民李純寨與本縣連界相離八十餘里四方人民驚走等因前來又經行仰鄰界廣東和平等縣差委官兵併力截捕及行南雄府推官趙珩率領始興等縣官兵策應一面通行各該守巡兵備守備等官分督各兵計辦錢糧就仰各道備呈兩廣提督總鎮總兵巡按衙門施行及江西鎮守撫

按官知會及具本題知再照前賊哨聚日衆又經委調廣東惠潮府衛所縣推官指揮等官周楫李喬木等各統所屬慣戰官兵并行守備惠潮指揮程鑒親統見在募操打手并借留及原調各該官軍兵快併力夾剿又經照得南贛汀漳南韶惠潮郴桂等府州縣專隸本院撫屬正為四省交界但有盜賊主發即該調兵夾剿不許互分彼此致誤軍機各賊見今遯回廣東地界在和平河源翁源始興龍南各縣之間牌行江廣該道守巡

兵備等官嚴督各該官兵人等分投前進不分彼此界限直抵有賊處所會合夾剿隨賊嚮往追殺務要搗其巢穴及搜捕盡絕有功重賞敢有延違定以軍法處治不貸續據江西贛州府衛同知等官伍佐等稟嘉靖六年三月十五日卯時原調和平縣鄉兵李鑑等在於龍南縣太平保東水村與賊交鋒殺死賊首曾蛇仔飛天鳳鑽山虎三名賊從五十餘徒并據廣東韶州府領兵通判符錫稟三月初二等日在於翁源縣地名馬子口

等處與賊對敵賊衆敗走生擒賊人李思隆等二十五
名前來查得先據江西分守嶺北道左叅政方楷稟該
龍南縣捕盜主簿蘇珪報稱二月二十五日前賊從橫
岡益徑往太平保將官兵殺敗捉擄董通判在陣又據
贛州府申三月初二日據健步廖允瓚齎執被虜通判
董鳴鳳牒稱據和平縣曾惟德陳積貴黃尚琦等各備
情詞願聽招撫緣由各報到臣隨經通行各該守巡兵
備守備等官督發府衛所縣官兵鄉夫人等約會夾剿

及照各賊嘯聚一千餘徒擄官告招仍肆劫掠無非詭計以緩我師又經嚴督官兵追剿及將誤事指揮劉鏜責發軍前殺賊具本題知又據廣東守備惠潮指揮程鑒稟稱四月初九日據千百長李鑑等走報追賊至九連山奪回原擄江西贛州府通判董鳴鳳并和平縣主簿汪清男汪權及擒斬賊徒三十二名顥俘獲賊屬六名口牛馬九頭匹等因并先據江西贛州府衛同知伍佐指揮姚璽稟稱本月初七日在地名中泐擒斬賊首

鬼吹角等一百七名顆奪獲黃旗一面初八日又追至
曲潭擒斬賊人賊級八名顆各報前來查得先為催督
剿賊及關防詐偽事牌行各該道府衛所縣領兵等官
隨賊嚮往不分縣界務將流賊剿殺盡絕儻或賊生詭
計逼令擄去通判掎寫告招票帖及假稱軍門招撫榜
文以緩我兵決不許聽信如賊夥中有將通判送出陣
前棄戈投生者方許收候呈請定奪去後今據前因就
將董鳴鳳責發軍前殺賊仍具本題知又據廣東等處

提刑按察司呈奉欽差提督兩廣軍務兼理巡撫都察院右都御史姚某案驗據守備惠潮指揮程鑑呈據惠州府和平縣知縣劉琰哨守龍川千戶所千戶吳德潤各稟報本年二月三十日據緝事軍夫項春等走報有贛州府統兵通判董鳴鳳哨兵夫二千名在江西龍南縣地方太平保銀山廟前屯劄本月二十五日未時被賊偷營計算將董通判拏獲去營等情到院會同欽差總鎮兩廣等處地方內官監太監鄭潤欽差鎮守兩廣

地方總兵官征蠻將軍撫寧侯朱麒議照江西官兵追剿流賊曾蛇仔等致被前賊將通判董鳴鳳捉擄入營移文約會督兵夾剿若不差官督催前進未免有失機宜除差官齎執令旗令牌前去督催外仰抄案回司轉行各道守巡兵備等官各作速親詣前項地方督行守備官員嚴督各該漢達官軍兵壯打手鄉夫人等約會江西官兵運謀設策先將通判董鳴鳳取出就將前賊或分兵撲剿或併力夾攻務要謀慮周悉計出萬全因

事制宜隨機應變大收全勝之功盡消兩省之患有功
重加旌賞奏請寔嘉決不相負若偏執違拗坐失事機
自分彼此致誤大事則國典具存罪難輕貸軍兵人等
敢有懷姦退縮不肯用命及妄殺良善重貽民害者輕
則聽各官從宜責治重則照本院欽奉勅諭內事理處
斬其指揮千百戶通判等官有犯拏解軍門議斬合用
錢糧徑行所在官司支用事完通將用過數目及擒斬
過功次緣由通行呈報仍呈提督南贛汀漳軍門及行

巡按廣東監察御史各知會等因呈報在卷本年六月初六日准兵部咨該臣題該本部議照前項地方素有盜賊今乃生發聚衆殺人放火劫掠人財比於往時聲勢頗大若不嚴行督捕誠恐為患益深合無本部行文提督南贛汀漳都御史潘某會行各該鎮巡官員嚴督該道守巡兵備等官整擷官兵尋襲風路隨賊嚮往務要運謀設法日下剿捕盡絕以靖地方事寧之日公同巡按御史將有功效勞并誤事人員逐一分明開奏

施行等因題奉聖旨是這地方盜賊竊發便行文都御史潘希曾會行各該鎮巡官嚴督該道守巡兵備等官整率官兵上緊設法剿捕務在日下盡絕以靖地方勿致滋蔓罪有所歸欽此除欽遵通行知會外續准兵部咨為地方緊急賊情事該巡撫江西右副都御史陳洪謨會同太監黎鑑巡按御史徐岱題內開稱欲即發兵追捕但會城到彼寫遠難以遙度且提督軍務都御史潘某駐劄在彼責任尤專況已調發同知等官伍佐等

前去剿捕除再嚴行該道帶管分守左叅政方楷帶管
分巡兵備副使林大輅俱親赴軍前相機撲捕等因題
奉聖旨兵部知道欽此欽遵查得先為前事該提督南
贛汀漳等處軍務都御史潘某題該本部覆題脩奉前
項欽依事理移咨欽遵又節准兵部咨為奪獲被擄官
員并地方緊急賊情事俱經查照外今據前因看得廣
東嶺東道生擒賊首鬼吹角是的其江西嶺北道先報
斬獲首級係是賊從已行改正查得江廣各道前後擒

斬首從賊人賊級共八百六十八名顯俘獲賊屬男婦
共二百五十九名口奪回被擄男婦共六十一名口奪
回牛馬共一百五十九頭匹賊銀九兩五錢七分段絹
綿葛布衣服一百一十件器械共三百二十四件紅黃
旗二面已經行將賊屬贓物與賞剩牛馬各變賣價銀
同贓銀及給剩器械俱貯庫被擄人口審明給親斬獲
賊級紀驗梟示其生擒賊犯俱發江西守巡嶺北道審
決內有情詞可疑者各行勘處外今照前因臣會同總

鎮兩廣等處地方內官監太監鄭潤提督兩廣軍務兼
理巡撫都察院右都御史姚鏌鎮守兩廣地方總兵官
征蠻將軍撫寧侯朱麒巡案廣東監察御史蘇恩議照
賊首曾蛇仔鬼吹角盧源黃尚琦等本以涖頭餘黨乃
敢反招倡亂糾合強徒開張旗號流劫鄉村而殺人放
火極其兇殘襲捉職官而擄掠姦汙特其餘事荼毒一
方動搖二省仰仗皇上德威廟堂至計數月之間渠魁
授首兇黨悉平巢穴蕩空地方寧靖及照江西嶺北道

分守左叅政方楷分巡副使林大輅廣東嶺東道分守
左叅議周震分巡兵脩僉事謝汝儀守脩惠潮以都指
揮體統行事指揮僉事程鑒嶺南道分守左叅政胡璉
分巡僉事劉喬守脩南韶都指揮僉事孫瑛督率惟嚴
而分布應援之有方謀力畢效而調度攻圍之得策協
心用命克收全功江西贛州府同知伍佐贛州衛指揮
使姚璽安遠縣知縣劉信大破賊陣連搗三巢而搜獲
有加廣東潮州府推官李喬木惠州府推官周楫惠州

衛指揮使高瑛指揮僉事雷潤王廷璋奪回擄官多獲
首惡而掃蕩無遺韶州府通判符錫夾剿窮搜亦多俘
馘福建守備汀漳都指揮僉事吳山江西守備南贛都
指揮僉事明德廣東南雄府推官趙珩分把要害致無
奔突以上各官似宜量錄以明勸功贛州府捕盜通判
董鳴鳳贛州衛指揮同知劉鏜始雖均於失事終則皆
能獲功此二臣者似宜許贖以明使過但陞賞予奪出
自朝廷非臣下所敢議也除催取擒斬功次并誤事人

員文冊公同各該巡按御史查明另奏外緣係剿平流
劫叛賊及節奉欽依便行文都御史潘希曾會行各該
鎮巡官嚴督該道守巡兵備等官整率官兵上緊設法
剿捕事理未敢擅便為此具本專差千戶楊忠親齎謹
題請旨

旌舉方面官員疏

題為旌舉方面官員事臣奉命提督南贛汀漳等處軍
務一應軍馬錢糧弭盜安民事宜督行江西福建廣東

湖廣各布按二司掌印守巡兵備等官共濟厥事中間
賢能官員相應旌舉除已經陞轉不開外訪得江西布
政司左布政使葉相才敏達而優於剴繁志正大而足
以任重右布政使張羽飭行謹而賢聲式著蒞事勤而
藩政以脩左叅政方楷分守有保障之勞接管無因循
之弊按察司副使林大輅領兵雖非所長司憲素稱執
法副使喻漢風裁之持久聞兵戎之備克振僉事鍾雲
瑞言行本於敬慎姦貪憚其嚴明福建布政司左布政

使陳錫性端雅而行脩才諳練而政舉左叅政查約政
疏通而不遺性嚴毅而有守按察司按察使周廣斷獄
有明決之才總憲得嚴肅之體廣東布政司左布政使
周宣剛嚴著風紀之司和厚敷承宣之政左叅政胡璉
政不擾而惠流才有為而名起按察司僉事謝汝儀肅
憲足以禁姦飭兵復能靖寇湖廣布政司左布政使丁
沂先任福建而聲績已著所守清約而終始不渝右布
政使潘珍廉慎之行孚於人人練達之才優於事事按

察司按察使盛儀操持慎而士行脩才識長而憲度舉
以上賢能皆堪旌舉乞勅吏部再加察訪將各官量為
擢用則明揚得人而臣工知勸矣緣係旌舉方面官員
事理未敢擅便為此具本專差舍人來儀親齎謹題請
旨


舉劾有司官員疏

題為舉劾有司官員事臣惟有司乃親民之職其賢不
肖係民生之休戚見賢而不能舉非所以勸功見不肖

而不能退非所以警衆臣訪得所屬江西原任贛州府
今調吉安府知府張漢慎篤足以守官精勤優於治劇
贛州府知府李顯風裁已見之內臺政聲復彰于劇郡
南安府知府呂律謹守得奉公之宜廉平有及下之澤
贛州府同知伍佐性介而守不渝官久而事益練廣東
南雄府知府伍箕剛介之操不回循良之績已著潮州
府知府王袍律已革前官之弊愛民有良守之風惠州
府知府顧遂才敏而政日修心公而人自服揭陽縣主

簿季本仕學之功有加子民之政匪懈以上各官皆賢
能昭著者也江西信豐縣知縣梁材畏謹而居官鮮失
疎緩而幹事不前福建歸化縣知縣彭中精力勉強而
向衰政務因循而欠舉廣東程鄉縣知縣王澤宅心寬
平而守不失任職尋常而政多弛此皆才力不及者也
湖廣郴州知州張觀帶鄉人以代吏書舞文虐民受賂
賂而致訐發被提計避江西贛州府通判薛文假嚴以
濟貪初政莫測遇事而巧取醜聲遂聞此皆貪汙不職

者也乞勅吏部再加察訪將張漢等量為擢用梁材等
別為更調張觀等速為罷黜則有司知所勸懲政清而
民安矣緣係舉劾有司官員事理未敢擅便為此具本
順差舍人來儀親齎謹題請旨



竹澗集奏議卷三